

Giugar fa vegnir liber e viv il carstgaun

In cudesch filosofic davart l'impurtanza dal giugar

CUN ALBERT VINZENS HA DISCURRÌ
CLAUDIA CADRUVI / ANR

■ **Quest atun cumpara «Spiel-Zeuge». En quest cudesch punctuescha il filosof Albert Vinzens quant impurtant ch'il giugar è – schizunt per creschids. El crititgescha tscherts pedagogs che han ina stoda moda da malduvrar e malchapor il giug mo sco med d'emprender. Vinzens lavura en l'Institut Rudolf Steiner a Kassel en Germania nua ch'el scolescha educaturas e pedagogas curativas.**

Tge giugais Vos gugent?

Albert Vinzens: Jau termagl fitg gugent en patratg. Jau pens vi dad insatge e vegn svelten en mes agen spazi nua ch'jau hai il sentiment dad esser liber ed hai il sentiment da pudair crear insatge.

Giugar n'è betg la fumitgasa da l'emprender

Tge avais Vos giugà sco uffant?

Nus essan savens stads giuadora ed avain fatg gieus selvadis, gieus da buobs, cun raiver, curren enturn e cun bandas che cumbattan in l'auter. Nus avain fatg lumparias en il quartier. Nus dastgavan anc quai. Oz na giess quai betg pli. Jau hai era fatg termagls en chasa cun giugarets. Jau hai gi gugent legos. Quai na dastgan ins betg dir dad aut en tscherts tschertgels da pedagogs.

Pertge betg? Legos fan chapir meglier spazi e dimensiuns?

Gea, ma la tscheppa ha ina furma fixa e n'ha perquai betg ina gronda valor ord vista pedagogica. En mia uffanza devi dentant anc simpla tscheppa da lego, en la quala ins pudeva vesair las pli bellas chaussas.

Vus scrivais in entir cudesch davart il giugar e rufidais plirs giadas explicit da dar ina definiziun dal giugar.

Quai è stà il motor per quest text. L'onni passà hai jau survegnì ina bell'incumbensa: dar in curs a pedagogas da «Singende Kindergärten» ch'i dat en differentas citads en Germania. Questas pedagogas èn scoladas fitg bain. Ma i ha dà difficultads. La manadra dal curs aveva ideas fixas tge ch'jau haja da raquintar per che sia gliעד saja instruida bain. Gia tar las preparati-



ALBERT VINZENS

Spiel-Zeuge

HOMMAGE AN DAS SPIEL

Mit einem Vorwort aus dem Neolithikum

Il frontispizi dal nov cudesch dal filosof Albert Vinzens.



«Forsa crod'jau ina giada si sco in da quels paucs carstgauns che han anc fatg termagls sco uffants», scriva Albert Vinzens en ses cudesch.

FOTO C.CADRUVI

vas hai jau declerà che quai na giaja betg uschia. La finala hai jau dà il curs. L'eco da la gliעד è stà positiv. Mo l'organisatura è stada trumpada.

Vus crititgais che pedagogs vulan instrumentalisar il giug.

Quest sentiment hai jau gi lezza giada. Suenter il curs hai jau rimnà patratgs ch'jau hai drizzà internamain a questa manadra. Perquai sa repeti en il cudesch adina puspè ch'i na nizzegia nagut da definir il giugar.

Noss geniturs na savevan betg adina tge che nus fetschian

Insacora sautigliais Vos lura tuttina trasora enturn ina definiziun. Vos giugais cuntut da betg definir il giugar.

Gea, ma quai ch'jau resent propi cun giugar na poss jau betg zugliar en plects. Tschertins da mes collegas da lavur instrueschan las diversas furmas da giug en la psicologia da svilup. Quai na savess jau mai. Gliez maina tenor mai bunamain davent dal giugar.

Tge che giugar n'è betg, schais Vos perencunter cler e net. Co statti cun monopoly? È gliez per Vos in giug?

Dependa. Jau mez hai gugent dà monopoly sco uffant. Sche nus giain oz cun noss uffants en Surselva en vacanzas vulan els era dar. Ma nus schain adina da bell'entschatta: Mo in di u mo ina saira u maximalmain dus dis!

È «prescha cun peda» per Vos in giug?

Gliez unfisescha memia spert.

E dar jass?

Per mai è quai mo in giug da fortuna. Cun dar jass davent jau adina uschè

malruassaivel damai ch'jau m'identifitgesch tant cun las bunas chartas sco cun las schletas chartas.

E ballape?

In uman po sa chapescha far chaussas incrediblas cun in bal e ses pes. Il ballape fin si tar l'elita mundiala è dentant ina fatschenta dira, pauc ludica. Jau schess ch'i na saja nagin giug, malgrà l'effect ch'ins numna «flow»: Sche duas squadras dattan uschè bain ensemen ch'ellas sa cumblidan ed i na va gnanc pli per la victoria, vegnan ellas en in «flow». Giugar è dentant dapli che «flow». Igl è pli modest. Il «flow» è ina sort euforia che sa dat sch'ins fa intensivamain sport. Ma igl è mo insatge fisic, ensaez insatge ch'ins po manipular. Sch'ins observa co che uffants pitschens – che san anc giugar endretg – sa cuntagnan, vesan ins: Quels na giogan betg mo per vegnir cun lur ego en in «flow» e per esser content.

Tge capita durant giugar?

Giugar è preschientscha spiertala. Ins sa charta en il uss. I n'è betg impurtant da cuntanscher ina finamira. Igl è impurtant ch'i cutizza. Impurtant è il mument ch'ins po inventar u furmar libramain. Tar quai tutgan er incaps. Ils uffants integreschan gea adina puspè novas reglas per ch'in giug restia legher e captivant.

En Voss cudesch crititgais Vos ch'ins maldovria l'expressiun dal giugar. Ins discorra per exempel da «global players». Era gieus da computer n'èn per Vos nagins gieus.

En gieus da computers è tut gia dà avant. Nagin ma po raquintar che computers sajan oz uschè intelligents ch'els pon crear atgnas reglas. Era la «gamificaziun» crescha incuntin: Per tut tge ch'ins fa – perfìn per il nettegiar l'abitaziun – datti oz gieus da computers che dattan

puncts. Quai n'ha da far lidi nagut cun giugar. Giugar fa ch'il carstgaun vegn liber e viv.

Giugar capita adina senza intents, menziunais Vos plirs giadas en Voss cudesch.

Mia chasa editura publitgescha uss gist in cudesch dal psicolog american Peter Grey. Per el è il giugar in impurtant factur en l'evoluziun. Las spezas emprovan a moda ludica da dumagnar tschertas sfidas. Ma Grey vesa il giug era sco regal da Dieu. Giugar n'è propi betg mo empender e betg lavur, era sche uffants prendan pli serius il giug che nus creschids la lavur.

Fred Donaldson, in specialist american, ha er influenzà Vos.

Dad el hai jau empendi il pli bler. Uffants che n'èn betg vegnids a frida en scola ha el prendi ord la classa ed ha cumenzà a giugar cun els a moda simpla ed originara. El è sa ruschnà cun els per ils plauns enturn, ha fatg da sa dumagnar e da sa strair. Donaldson di ch'il giugar saja in grond regal per la carstgaunadad. El tegn distanza dad expressiuns sco «flow» u cumparegliazions cun la lavur.

Pertge duai il carstgaun giugar?

Perquai ch'el na fiss uschiglio betg carstgaun. Ins po esser fitg serius enten giugar. Joseph Beuys ha giugà sin aut nivel. Or da tut tge ch'el ha piglià a maun hai dà insatge. En saez ha el adina mo giugà cun ina enorma preschientscha spiertala ed ha gi ina demananza comica cun chaussas seriusas. Il giug fa che las chaussas daventan pli levas. I fiss bain bel sch'il carstgaun avess dapli levezza.

Constatti che uffants dad oz na san betg pli far termagls endretg?

Ins sto dar adatg cun talas pretenziuns. Jau daud savens da praticantas ch'ills uffants en scolina na fetschian betg pli termagls. Els mo pitgian in

l'auter, hajan lungurella u tugnian trasora. Ma quant svelten sa lascha in'uffant puspè surmanar da giugar? Sche geniturs, scolas, scolinas, medis, terapeuts e tuts ensemen dian incuntin: Ti na dastgas betg vegnir tschuf, betg ta metter en privel, betg empruvar insatge che pudessan disdir, betg far sbagls, lura cundiziuneschan ins l'uffant da bell'entschatta sin ina biografia che reussescha mo a mesas. I vegn a dar uffants che n'han mai pudì empruvar ora sezs insatge.

Vus avais anc pudì far termagls endretg en Vossa uffanza. Voss geniturs han pia fatg endretg insatge?

Nus essan stads quatter uffants. La mamma ha nettegià, ha cuschinà, è stada a chasa ed ha guardà ch'i marschia. Il bab ha gudagnà ils daners. Jau e mes fragliuns n'essan betg stads survegliads trasora. Statistica musan: Avant intgins decennis han il geniturs laschà ir ils uffants dus u trais kilometers davent da chasa, oz mo paucs meters pli. Il pli gugent tarmettan ins ils uffants en chombra avant il computer.

Jau daud savens ch'ills uffants na termaglian betg pli

E co eri tar Vos?

Nus abitavan amez la citad da Cuira. La polizia ha ina giada purtà mes frar a chasa ch'el era i fin ora Masans. El era anc in bolleret. Insumma, jau e mes frar avain anc pudì ir cun noss veloins enturn il Postplatz – en cunterdirezziun dal traffic. Noss geniturs n'avevan betg tema e n'eran betg trasora sissura tge che nus fetschian.

Pon ins chapir Voss cudesch sco pledoi per il giugar?

Gea, gliez èsi schon. Impurtant è da tegnair dapart bain las expressiuns: giugar ed empender, giugar e lavur. En ils plans d'instrucziun en Germania vegn pretendi che giugar saja adina empender. Uschia daventa il giugar mo pli la fumitgasa da l'empender. Gia en mes emprim cudesch davart questa tematica hai jau batti persuentar ch'il giugar na vegnia betg instrumentalisa.

Ed en la nova publicaziun?

En quest cudesch hai jau empruvà da descriver las qualitads positivs dal far termagls. Gliez è pli pretensius. Jau hai percurschi: Pli datiers ch'jau vegn da mia uffanza, pli datiers ch'jau vegn al giugar. Ma lura svanescha il linguatg.

Albert Vinzens, *Spiel-Zeuge, Hommage an das Spiel*, thinkOya, 2015, ca. 160 paginas, ISBN 978-3-927369-94-8, 22.80 euros u 27 francs.

Creschi si a Cuira

Albert Vinzens (59 onns) è creschi si a Cuira. Vinzens ha studegià filosofia a Turitg e lavura dapi passa ventg onns sco docent en l'Institut Rudolf Steiner a Kassel en Germania. «Spiel-Zeuge» è sia segunda publicaziun, en la quala el sa fatschenta cun il giugar. Vinzens è bab da quatter uffants. El turna regularmain en il Grischnun per far vacanzas en ina tegia tranter Rueun e Pigniu.